

# Vun driweriwer

erscheint auf [www.lenauheim.de](http://www.lenauheim.de)

monatliche  
Erscheinung

Juni 2011

von Helen Alba

## Noh 40 Jahr wieder freiwillichi Feuerwehr

Feiertach for alli Bogaroscher

Es war Mitte Mai, e wunerscheene Summertach. E rotes, modernes Feuerwehrauto is mit Sirenegheil dorch die Bogaroscher Haapgass gerast. Es hat nirgens gebrennt, Gott sei Dank! Es war nor e Demonstration, wie mer mit dem Auto umgehn muss.

Wie sin die Bogaroscher awer zu dem Feuerwehrauto kumm? Es git in der Ortschaft e Kinerheim, des wu vum MUT-Verein aus Schwäbisch Hall gegrind gin is un seit 20 Jahr unerstitzt werd. Die Vereinsmitglieder, des sin beherzti Leit, immer wieder kumme se reihum un repariere, bringe Kleidung un Nahrung for die Kiner. Doch nit nor des, ach Landwirtschaftsmaschine, Eelpress, Milchverarbeitungsanlage is in dem Heim zu gsiehn. De Verein „Mitmache un Teele“ (MUT) git vun de drei Stutz-Gschwister vorbildlich geleit: de Zwillingbrieder Gerhardt un Walter un ihrer Schwester Gertrud.

Vor ungefähr anerthalb Jahr hat de Bogaroscher Josif Mărcuș, Gemeinderat, die Stutz-Brieder angered, ob se nit e Feuerwehrauto uftreiw un uf Bogarosch bringe kennte. Es hat schon e Weil gedauert, bis des dann gschafft war un im Ort ankumm is. Ganz Bogarosch war an sellem Tach uf de Been. Die Übergabe un Demonstration hat in der Kerchegass stattfun, vor em ehemalige Frauenvereinsitz. Die Leit aus Schwäbisch Hall han erscht die Bogaroscher inschtruiert, wie se mit de Schleich, Pumpe un em Schaam umgehn misse, dann wars soweit. Es is gspritzt gin, zur Freed vun de Kinner. Die älteri Generation hat wehmietich zruckgedenkt, wie des frieher mit der mechnisch Feuerwehr im Dorf war. Des Feuerleschauto soll awer ach in Lenauheim un Grawatz ingsetzt gin, wanns mol zu eem Brand kumme sellt. Des hat de Lenauheimer Richter, Ilie Suciu, fescht versproch.

Ja, un zu dem Anlass is am gleiche Tach ach e Feuerwehrmannschaft zammgestellt gin. Sie bsteht aus 16 Persone, ihre Kommandant ist de Vetter Jakob Bărdan, der was meh wie 20 Jahr lang Feuerwehrmann in Temeschwar bei der „Electromotor“-Fabrik war. Alli Feuerwehrmänner han Munture kriet, mit Helm un allem Drum un Dran.

Noh dere Demo is des Feuerleschauto im Sitz der ehemoliche Feuerwehr, in der Schulegass, unergstellt gin.